

AWIG – AWIG
DESA PAKRAMAN GUWANG



DESA PAKRAMAN GUWANG
WARSA 2017

Daging Awig-Awig Desa Pakraman Guwang

Halaman :

Murdha Citta.....	i
Daging Awig-Awig.....	ii
Pratamas Sargah :	
Aran lan wewidangan Desa.....	1
Dwityas Sargah :	
Petitis lan pemikukuh.....	1
Trityas Sargah :	
Sukerta Tata Pakraman.....	2
Palet 1 : Indik Krama	2
Swadarma lan swadikara Krama Desa, Krama Tamiu lan Tamiu.....	2
Pewilangan Krama Desa Pakraman Guwang	3
Palet 2 : Indik Prejuru / Dulu Desa.....	7
Pituas utawi olih-olihan Prejuru	10
Indik Pecalang.....	11
Indik Undagi lan Pengrombo.....	11
Palet 3 : Indik Kulkul.....	12
Palet 4 : Indik Paruman miwah Sangkepan	13
Palet 5 : Indik Druwen Desa	15
Palet 6 : Indik Pikolih miwah Kewigunan	15
Palet 7 : Indik Sukerta Pemitegep.....	16
Kaping 1 : Indik Karang, Tegal lan Carik	16
Kaping 2 : Indik Pepayonan	17
Kaping 3 : Indik Wewangunan	18
Kaping 4 : Indik Wewalungan	19
Kaping 5 : Indik Baya	19
Kaping 6 : Indik Penyanggran Banjar	20
Caturtyas Sargah:	
Sukerta Tata Agama.....	20
Palet 1 : Indik Dewa Yadnya.....	20
Tata Sukerta Kahyangan.....	24
Indik Pemangku.....	25
Palet 2 : Indik Resi Yadnya.....	27
Palet 3 : Indik Pitra Yadnya.....	27
Indik Ngidih Sawa.....	29

Indik Atiwa – tiwa utawi Pengabenan.....	30
Pemangku Kelayu Sekaran.....	31
Palet 4: Indik Manusa Yadnya.....	32
Palet 5 : Indik Bhuta Yadnya.....	32
Indik Upakara Caru lan Tawur.....	33
Indik Penyepian	35
Indik Siwa Ratri	35
Pancatyas Sargah :	
Sukerta Tata Pawongan	36
Palet 1 : Indik Pewiwahan	36
Palet 2 : Indik Embas /Kelahiran.....	37
Palet 3 : Indik Keweruhan (Pendididkan).....	37
Palet 4 : Indik Kekerasan ring Kulawarga.....	37
Palet 5 : Indik Hubungan Sosial ring Krama sami.....	38
Palet 6 : Indik Palas Merabian.....	38
Palet 7 : Indik Sentana.....	39
Palet 8 : Indik Warisan.....	41
Tata titi Pewarisan.....	42
Sadtyas Sargah :	
Wicara lan Pemidanda	42
Palet 1 : Indik Wicara.....	42
Palet 2 : Indik Pemidanda	43
Saptatyas Sargah :	
Nguwah nguwuhin Awig-Awig	43
Astatyas Sargah :	
Samapta	44

PRATAMAS SARGAH
ARAN LAN WEWIDANGAN DESA

Pawos 1

- (1) Desa Pakraman puniki mewasta Desa Pakraman Guwang.
- (2) Jebar kekuwub wewidangan nyane mewates nyatur :
 - a. Sisi lor : Luwah Wos lan Desa Pakraman Cemenggaon.
 - b. Sisi wetan : Desa Pakraman Rangkan.
 - c. Sisi kidul : Desa Pakraman Ketewel.
 - d. Sisi kulon : Desa Pakraman Batuyang.
- (3) Desa puniki kewangun antuk Peumahan karang ayahan Desa, lan karang Gunakaya turmaning kepah dados 7 (pitung) Banjar, luire :
 - a. Banjar Tegal.
 - b. Banjar Buluh.
 - c. Banjar Manikan.
 - d. Banjar Tatag.
 - e. Banjar Dangingjalan.
 - f. Banjar Sakih.
 - g. Banjar Wangbung.

DWITYAS SARGAH
PETITIS LAN PEMIKUKUH

Pawos 2

Luir petitis Desa Pakraman Guwang luire:

- a. Mikukuhang lan ngrajegang Sang Hyang Agama.
- b. Nginggilang tata prewerti Agama Hindu.
- c. Ngrajegang kesukertan Desa manut Tri Hita Karana.

Pawos 3

Desa Pakraman Guwang ngemanggehang pemikukuh minakadi :

- a. Pancasila.
- b. Undang-Undang Dasar 1945.
- c. Undang- Undang No. 39 Tahun 1999 tentang HAM.
- d. Perda Provinsi Bali No.3 Tahun 2001 tentang Desa Pakraman telah diubah dengan Perda Provinsi Bali No. 3 Tahun 2003 tentang Desa Pakraman.
- e. Ngarajegang kasukertah desa saha pawongannya sakala lan niskala.

TRITYAS SARGAH
SUKERTA TATA PAKRAMAN

Palet 1

INDIK KRAMA

Pawos 4

- (1) Krama Desa inggih punika kulawarga sane meagama Hindu lan mipil utawi keilekitayang dados krama Desa Pakraman Guwang.
- (2) Krama Tamiu inggih punika kulawarga sane meagama Hindu sakewanten nenten mipil utawi nenten keilekitayang dados krama Desa Pakraman Guwang.
- (3) Siosan sane kesurat sekadi ring luwur kebawos Tamiu, inggih punika wong utawi jatma sane nenten meagama Hindu.

INDIK SWADARMA LAN SWADIKARA
KRAMA DESA, KRAMA TAMIU LAN TAMIU

Pawos 5

- (1) Swadarma lan Swadikara Krama Desa
 - a. Polih pesayuban Prejuru
 - b. Polih penyanggran Desa / Banjar
 - c. Nyarengin paruman Desa / Paruman Banjar
 - d. Dados mepuangkid, nyuksukin lan melaga
 - e. Ngemanggehang seluwir kecaping awig-awig
 - f. Nincapan kesukertan Desa Pakraman lan peiketan ring krama Desa sami
 - g. Ngayah, pepeson lan mogpog
 - h. Nginutin pituduh Prejuru.
- (2) Swadarma lan Swadikara Krama Tamiu lan Tamiu manut **perarem**.
- (3) Pewanengan nampi Tamiu:
 - a. Sane nampi Tamiu, patut matur nguningang majeng ring Kelihan Banjar, pinih suwe 3 (tigang) rahina, tur Tamiu punika mangda makta ilikita pastika.
 - b. Yening sane nampi Tamiu langkungan ring tigang rahina nenten nguningang ring Kelihan Banjar wenang kedanda manut **perarem**.
- (4) Swadarma Tamiu inggih punika patut sareng ngutsahayang kesukertan Desa manut Awig-awig sane kemanggehang ring Desa Pakraman Guwang.

PEWILANGAN KRAMA DESA PAKRAMAN GUWANG

Pawos 6

a. Krama Pengarep .

1. Sane sampun mewiwaha / merabian.
Yening wenten Krama meduwe putra lanang langkungan ring adiri, yening sampun merabian adiri tetep mekrama pengarep asiki, selantur ipun yening wenten putran ipun malih mewiwaha / merabian sane duwuran utawi alitan, wenang malih tedun mekrama pengarep, asapunika selantur ipun.
2. Yening wenten Krama pengarep asiki ngamong peumahan karang Desa nenten meduwe putra utawi nenten kantun meduwe putra, kantun nyeneng lanang istri, sesampune meyusa 60 (enem dasa) warsa kepatutan ngidih sentana, selami pewanengan nyane keselehin olih Prejuru.
3. Sane nyeledihin ayah tua.
Sane nyeledihin ayah tua mangda nyadokang ring Prejuru Banjar selantur ipun Prejuru Banjar mangda netesang kesujatian ipun, sesampune janten mangda kesobyahang ring Banjar.
4. Yening wenten Krama Pengarep sane sampun meyusa 60 (enem dasa) warsa utawi sampun nyada, kantun nyeneng lanang lan istri meduwe panak luh utawi luh-luh sampun meyusa 21 (selikur) warsa durung mewiwaha / merabian, wenten ring sejeroning peumahan karang Desa utawi peumahan karang Gunakaya sane wenten krama pengarep asiki utawi langkungan wenang dados Krama Pengarep Istri.

b. Krama Tapukan .

1. Sane kebaos Krama Tapukan inggih punika sane balu yening meduwe putra kari alit-alit.
2. Yening putran sane balu punika lanang, sampun meyusa 21 (selikur) warsa patut tedun mebanjar, mekrama pengarep, sejabaning nenten waras.
3. Yening putran sane balu punika istri, sampun meyusa 21 (selikur) warsa patut tedun mebanjar mekrama pengarep istri, sejabaning nenten waras.
4. Yening putran sane balu punika sampun meyusa 21 (selikur) warsa ketinggalin antuk reraman ipun lanang wadon, kantun ipun senunggal megenah ring sejeroning peumahan karang Desa utawi peumahan karang Gunakaya, sane wenten krama pengarep asiki utawi langkungan, wenang mekrama tapukan, yening sampun meyusa 60 (enem dasa) warsa durung mewiwaha / merabian, wenang mekrama samputan, yening wenten ngundulang kedadosang, kesobyahang ring Paruman Banjar nemonin tumpek.

5. Yening sane balu punika bekung utawi nenten kantun meduwe putra megenah ring sejeroning peumahan karang Desa utawi peumahan karang Gunakaya sane wenten krama pengarep asiki utawi langkungan , lanang utawi istrin ipun durung keabenang wenang mekrama tapukan , yening sampun keabenang wenang mekrama samputan , yening wenten ngundulang kedadosang , kesobyahang ring Paruman Banjar nemonin tumpek.
6. Yening sane balu ngeraga, ngamong paumahan karang Desa wenang mekrama tapukan, yening sampun meyusa 60 (enem dasa) warsa patut ngidih sentana, selami pewanengannyane keselehin olih Prejuru.
7. Suang-suang Krama Banjar/Desa kedadosang ngundulang nanging riwekasan krama punika sampun mewiwaha / merabian patut tedun mebanjar, mekrama pengarep.

c. **Krama Samputan.**

1. Sane kebaos Krama Samputan inggih punika anak alit ketinggalin rerama lanang wadon nenten wenten ngundulang.
2. Yening wenten anak alit ketinggalin rerama lanang wadon kari ipun senunggal utawi ngeraga ngamong peumahan karang Desa wenang mekrama samputan nenten dados keundulang, sesampune mayusa 21 (selikur) warsa wenang mekrama tapukan, sesampune meyusa 60 (enem dasa) warsa kepatutan ngidih sentana, selami pewanengannyane keselehin olih Prejuru.
3. Yening wenten anak alit ketinggalin rerama lanang wadon kari ipun senunggal utawi ngeraga ngamong peumahan karang Gunakaya wenang mekrama samputan yening wenten ngundulang kedadosang, kesobyahang ring Paruman Banjar nemonin tumpek.
4. Yening wenten anak alit ketinggalin rerama lanang wadon kari ipun senunggal utawi ngeraga megenah ring peumahan karang Desa utawi peumahan karang Gunakaya sane wenten Krama pengarep asiki utawi langkungan, wenang mekrama samputan, yening wenten ngundulang kedadosang kesobyahang ring Paruman Banjar nemonin tumpek. Yening nenten wenten ngundulang, anak alit sampun meyusa 21 (selikur) warsa wenang mekrama tapukan, yening sampun meyusa 70 (pitung dasa) warsa wenang mekrama samputan, yening wenten ngundulang kedadosang kesobyahang ring Paruman Banjar nemonin tumpek.
5. Yening Krama Samputan (nyamput) sareng kalih (nyama adi) sinalih unggil sampun meyusa 21 (selikur) warsa wenang mekrama tapukan.
6. Yening Krama Samputan (nyamput) langkungan ring adiri, sami sampun meyusa 21 (selikur) warsa tetep dados mekrama tapukan, yening sinalih unggil sampun mewiwaha / merabian wenang mekrama pengarep.

7. Yening wenten Krama Samputan punika kelayu sekaran patut kesukserahang ring purusa, yening nenten wenten purusa, kesukserahang ke wadu, yening nenten wenten wadu, kesukserahang ke banjar.
8. Yening wenten krama balu sangkaning nyapian (cerai) ngajak panak mulih keumah daha (keumah wed) ring sejeroning peumahan karang Desa utawi peumahan karang Gunakaya sane wenten krama pengarep asiki utawi langkungan patut tedun mekrama samputan. Yening wenten sane ngundulang panaknyane kedadosang, sane balu punika kebaos mulih daha, kesobyahang ring Paruman Banjar nemonin tumpek.

Pawos 7

- (1) Ngawit dados Krama Desa utawi Banjar :
 - a. Sangkaning ngamong karang.
 - b. Melarapan antuk pewiwahan / merabian.
 - c. Wit jenek ring Desa Pakraman Guwang, tur lila dados krama.
- (2) Penemayan tedun mekrama Desa / Banjar :
 - a. Melarapan antuk pewiwahan tur mesadok ngawit tumpek wusan Nyepi.
 - b. Yening wenten krama Tamiu megenah ring wewidangan Desa Pakraman Guwang ngamong peumahan karang Gunakaya manut **perarem**.

Pawos 8

- (1) Sehanan Krama Desa sami keni tetegenan (ayah-ayahan miwah pepeson utawi urunan) :
 - a. Krama Pengarep keni ayahn miwah pepeson utawi urunan sewungkul.
 - b. Krama Tapukan.
 1. Yening wenten tapukan sane ngamong Peumahan karang Desa utawi Peumahan karang Gunakaya senunggal utawi ngeraga, keni pepeson utawi urunan sewungkul nenten keni ayahan.
 2. Yening wenten tapukan ring sejeroning peumahan karang Desa utawi peumahan karang Gunakaya sane wenten krama pangarep asiki utawi langkungan, keni pepeson utawi urunan pah tenga ($\frac{1}{2}$) nenten keni ayahan.
 3. Yening wenten tapukan tanpa karang keni pepeson utawi urunan aprapatan ($\frac{1}{4}$) nenten keni ayahan.
 - c. Krama Samputan.

1. Yening wenten samputan ngamong peumahan karang Desa utawi peumahan karang Gunakaya senunggal utawi ngeraga keni pepeson utawi urunan aprapatan ($\frac{1}{4}$) nenten keni ayahan.
2. Yening wenten samputan sane megenah ring sejeroning peumahan karang Desa utawi peumahan karang Gunakaya sane wenten Krama pengarep asiki utawi langkungan, keni pepeson utawi urunan pah nem ($\frac{1}{6}$) nenten keni ayahan.
3. Yening wenten samputan tanpa karang keni pepeson utawi urunan pah kutus ($\frac{1}{8}$) nenten keni ayahan.

(2). Krama pengarep istri nenten keni ayah-ayahan manut **perarem**.

Pawos 9

- (1) Krama Banjar / Desa kedadosang mepuwangkid utawi nenten tedun :
 - a. Sane sungkan.
 - b. Sane metepetin meduwe oka selami dereng kepus udel.
 - c. Sane meduwe Yadnya manut **perarem**.
- (2) Krama Banjar / Desa Pakraman sane megenah ring tiosan Desa sareng kulawargannyane sami, dados melaga kekaryan sekemawon pepeson utawi urunan ring Banjar apatutan.
- (3) Krama Banjar / Desa sane melaga nenten dados kejudi dados Prejuru, sejawanin ipun lila.
- (4) Krama Banjar / Desa Pakraman dados nyusukin ayahan tur sane nyusukin punika sampun meyusa 17 (pitu welas) warsa lan mekrama Desa.
- (5) Sane dados Prejuru Banjar / Desa Pakraman utawi Dinas nenten kedadosang melaga sedurung pewanengan swedarmannyane.
- (6) Krama Banjar / Desa kedadosang nyada sane mepiteges ngemademang ayahan, inggih punika Krama pengarep sane sampun meyusa pitung dasa warsa, kantun nyeneng lanang lan istri, nenten meduwe panak.
 - a. Prade wenten wong nyada ring sejeroning peumahan karang Desa utawi peumahan karang Gunakaya sane wenten Krama pengarep asiki utawi langkungan, sang nyada punika pateh sekadi krama tapukan.
 - b. Prade sinalih tunggil lanang utawi istri wong nyada punika padem lan sampun keabenang, kari ipun senunggal, wong nyada punika pateh sekadi krama samputan yening wenten ngundulang kedadosang, kesobyahang ring Paruman Banjar nemonin tumpek.

Pawos 10

- (1) Wusan mekrama banjar sangkaning : Pinunas ngeraga ninggal ketios Banjar kantun ring wewidangan Desa Pakraman Guwang manut **perarem**.
- (2) Wusan mekrama Desa sangkaning :
 - a. Pinunas ngeraga ninggal ketios Desa utawi ninggal ke dura Desa utawi ngelintangin segara manut **perarem**.
 - b. Ten keajak mekrama duwaning sampun nenten sida ngehehin solah, lan parilaksana setata lempas ring kecaping Awig-awig.
 - c. Nenten kari megama Hindu.
- (3) Sang wusan mekrama :
 - a. Patut ngewaliang karang ayahan Desa.
 - b. Nenten polih pah-pahan pedruwen Banjar / Desa.
 - c. Nenten polih pesayuban sejeroning ala ayu.
 - d. Nenten kepatutan ngangge seluwiring druwen Desa.
- (4) Yening wenten wedan Krama Banjar sane sampun ninggal ketios Banjar kantun ring wewidangan Desa Pakraman Guwang , kepungkuran ipun malih mewali tedun mebanjar ring Banjar wed, patut ketibakin danda encak-encik manut **perarem**.
- (5) Yening wenten wedan Krama Desa Pakraman Guwang sampun ninggal Desa utawi megenah ring dura Desa utawi dura Negara, kepungkuran ipun malih rauh ke Desa Pakraman Guwang tur manah jagi tedun mebanjar / medesa, manut **perarem**.

Palet 2

INDIK PREJURU / DULU DESA

Pawos 11

- (1) Prejuru Desa kemanggehang sekadi ring sor :
 - a. Kerta Desa inggih punika :
Majelis Desa Pakraman sane anggan nyane : Bendesa, Saba Desa, Kelian Adat, lan Perbekel pinaka Pewirasa.
 - b. Saba Desa inggih punika :
Lembaga Perwakilan Desa Pakraman, anggan nyane mewit saking suang-suang Banjar satusan.
 - c. Bendesa Pakraman inggih punika :
Manggala sane ngenterang pemargi ring sejeroning parahyangan, pawongan, lan pelemahan ring Desa Pakraman Guwang.
 - d. Kelihan Adat inggih punika :

Mangzala sane ngenterang pemargi ring sejeroning parahyangan, pawongan, lan pelemahan ring Banjar Adat nyane suang-suang, tur ngewantu nampa bawos jero Bendesa.

(2) Tata-titi ngadegang Prejuru Desa :

a. Ngadegang Saba Desa :

1. Mewiwit saking krama pengarep sane sampun mewiwaha / merabian.
2. Keadegang melarapan kecatri ring Paruman saking limang Banjar satusan.
3. Ritatkala kecatri yusannyane nenten langkung ring 60 (nem dasa) warsa
4. Sampun naenang ngayah dados Prejuru Adat utawi limbak ring keweruhan.
5. Kelihan Saba, Penyarikan Saba, lan Juru Raksa Saba keadegang olih Paruman Saba.

b. Ngadegang Bendesa :

1. Mewiwit saking Krama pengarep sane sampun mewiwaha / merabian
2. Melarapan kecatri ring Paruman Banjar satusan lan suang-suang ngemedalan bebakalan Bendesa adiri-adiri.
3. Ritatkala kecatri yusannyane nenten langkung ring 60 (nem dasa) warsa.
4. Sampun naenang ngayah dados Prejuru Adat utawi limbak ring keweruhan.
5. Bebakalan Bendesa saking limang Banjar satusan silih sinunggilnyane kecatri dados Bendesa ring Paruman Kerta Desa.
6. Bebakalan Bendesa sane tiosan kecatri olih Saba medasar antuk peiguman sareng Bendesa, sane ngewantu dados :
 - a) Pangliman / Petajuh pinaka Wakilnyane.
 - b) Penyarikan pinaka Juru Surat.
 - c) Petengen pinaka Juru Raksa duwen Desa.
 - d) Kesinoman pinaka Juru arah.

c. Ngadegang Kelihan Adat :

1. Mewiwit saking Krama pengarep sane sampun mewiwaha / merabian.
2. Keadegang melarapan kecatri ring Paruman Banjar.
3. Keilikitayang lan ketegepin antuk Dewa Saksi ring Kahyangan Tiga olih Jero Bendesa.

Pawos 12

- (1) Swadarmaning Kerta Desa inggih punika nepasin sehananing wicara lan pikobet ring Desa.
- (2) Swadarmaning lan pewanengan Bendesa Desa Pakraman luire :
 - a. Ngenterang Paruman Desa lan Paruman Kerta Desa.
 - b. Ngenterang pemargin Awig-Awig lan Perarem.
 - c. Ngenterang pemargin Upacara sane kemargiang olih Desa Pakraman Guwang.

- d. Niwakang pematut prade wenten wicara.
- e. Niwakang pedewasan manut Desa, Kala, Patra.
- f. Ngilikitayang ritatkala ngadegang Prejuru.
- g. Nitenin lan nureksin sekeluwirin Pedruwen Desa.
- h. Ngelaksanyang utawi nitahang pengerancana ring Desa Pakraman.
- i. Dados duta rikanjekan jaga metemuang bawos ring anak tiosan utawi Guru Wisesa.
- j. Pinaka saksi ritatkala wenten krama ngelaksanyang upacara Panca Yadnya.
- k. Bendesa nyiagayang prebea ring sejeroning operasional Saba Desa risampun polih pemutus saking paruman Kerta Desa.
- l. Tigang Sasih sedurung pewanengan nyane telas mangda mesadok ring Saba Desa.
- m. Pewanengan linggih Bendesa $2\frac{1}{2}$ (kalih warsa tengah), dados kecatri malih apisan.

(3) Swadarmaning lan pewanengan Saba Desa luire :

- a. Ngripta lan nguwah-nguwuhin Awig-Awig miwah Perarem.
- b. Nitenin lan nureksin pemargin Bendesa.
- c. Ngrincikang kriya semaya sareng Bendesa.
- d. Nyarengin nepasang wicara lan pikobet-pikobet ring Desa.
- e. Ngenter paruman Kerta Desa ritatkala nyudi lan ngadegin Bendesa.
- f. Tigang sasih sedurung pewanengan nyane telas mangda mesadok ring Bendesa.
- g. Pewanengan linggih Saba Desa $2\frac{1}{2}$ (kalih warsa tengah).

(4) Swadarmaning lan pewanengan Kelihan Adat Desa Pakraman Guwang luire:

- a. Dados pemucuk (pemimpin) ring Banjar Adat.
- b. Ngenterang Paruman ring Banjar Adat.
- c. Dados pemucuk ritatkala wenten Upacara Panca Yadnya.
- d. Dados pemucuk nampa baos saking Jero Bendesa, turmaning ngelaksanayang ring Banjar.
- e. Pinaka utusan saking Banjar ritatkala wenten pengrencana sane kebaosang olih Bendesa lan Saba Desa.
- f. Pewanengan dados Kelihan Adat $2\frac{1}{2}$ (kalih warsa tengah).

(5) Penyarikan Banjar :

- a. Kecatri ring paruman Banjar lan swadarmannyane ngewantu kelihan Banjar.
- b. Pewanengan dados Penyarikan awarsa.

PITUAS UTAWI OLIH-OLIHAN PREJURU

Pawos 13

- (1) Pituas utawi olih-olihan Bendesa lan angga :
 - a. Luput manuk.
 - b. Risampun wusan ngayah ring Desa polih luput ayahan manut **perarem**.
 - c. Ritatkala Bendesa lan angga kelayu sekaran polih dana punia manut **perarem**.
 - d. Olih-olihan sane tiosan manut **perarem**.

- (2) Pituas utawi olih-olihan Saba Desa :
 - a. Luput manuk.
 - b. Risampun wusan ngayah ring Desa polih luput ayahan manut **perarem**.
 - c. Ritatkala Saba Desa kelayu sekaran polih dana punia manut **perarem**.
 - d. Olih-olihan sane tiosan manut **perarem**.

- (3) Pituas utawi olih-olihan Kelihan Adat :
 - a. Luput manuk.
 - b. Risampun wusan ngayah ring Desa polih luput ayahan manut **perarem**.
 - c. Ritatkala Kelihan Adat kelayu sekaran polih dana punia manut **perarem**.
 - d. Olih-olihan sane tiosan manut **perarem**.

- (4) Pituas utawi olih-olihan Penyarikan Banjar :
 - a. Luput manuk.
 - b. Risampun wusan ngayah polih luput manut **perarem**.

- (5) Pituas utawi olih-olihan Pengayah-pengayah ring Desa Pakraman sane tiosan kebaos ring ajeng lan Prejuru Dinas polih luput manut **perarem**.

Pawos 14

- (1) Prejuru Desa kegentosin riantukan :
 - a. Pewanengan sampun telas
 - b. Seda
 - c. Pinunas ngeraga
 - d. Sungkan
 - e. Keraryanin duwaning lempas ring swadarma.

- (2) Prejuru Desa kegentosin patut ring sejeroning Paruman tur keingkupin olih Krama Desa.

INDIK PECALANG

Pawos 15

- (1) Pecalang pinaka pengrajeg ketreptian lan kesukertan ring Desa Pekraman Guwang.
- (2) Pecalang sane kemanggehang ring Desa Pekraman Guwang akeh nyane manut **perarem**.
- (3) Bebakalan Pecalang :
 - a. Mewiwit saking krama Desa Pekraman Guwang.
 - b. Sehat Jasmani lan Rohani.
- (4) Swadarmaning Pecalang luire :
 - a. Ngrajegang ketreptian lan kesukertan Desa.
 - b. Ngewantu Bendesa ngemargiang swadarmannyane turmaning ngelaksanayang sekancan titah inucap.
 - c. Pinaka petilik ritatkala Krama Desa ngemargiang Catur Brata Penyepian.
 - d. Pewanengan dados Pecalang 5 (limang) warsa.
- (5) Prade wenten Pecalang sene lempas ring swadarma patut :
 - a. Kebaosan ring peiketan Pecalang.
 - b. Prade nenten ngemolihang pemutus, mangda kebaosan ring Desa manut **perarem**.
- (6) Pituas utawi olih-olihan Pecalang:
 - a. Luput manuk.
 - b. Risampun wusan ngayah ring Desa polih luput ayahan manut **perarem**

INDIK UNDAGI LAN PENGROMBO

Pawos 16

- (1) Undagi
 - a. Undagi inggih punika pengayah sane ngewantu Prejuru Desa perindikan wewangunan.
 - b. Undagi kejudi olih Prejuru Desa Pakraman manut kewigunan ipun.
 - c. Swadarma lan pituasnyane manut **perarem**.
- (2) Pengrombo
 - a. Pengrombo inggih punika pengayah sane ngewantu Prejuru Desa.
 - b. Sehananing Pengrombo Desa patut kewintenin olih Desa.

- c. Pewilangan pengrombo, swadarmaning pengrombo, kewentenana pengrombo lan pituasnyane manut perarem

Palet 3

INDIK KULKUL

Pawos 17

- (1) Kulkul inggih punika satmaka dedaunan utawi ceciren wenten panemaya sane patut keelingang olih Krama Banjar / Desa.
- (2) Genah kulkul :
 - a. Ring Pura Kahyangan Tiga.
 - b. Ring Pura Dadia utawi Pantian.
 - c. Ring Banjar-Banjar.
 - d. Ring Tempekan-Tempekan.
 - e. Ring Sekaa-Sekaa.
- (3) Sane patut nyuarang Kulkul :
 - a. Prejuru Banjar / Desa.
 - b. Krama Banjar / Desa Pakraman sane sampun kepituduh olih Prejuru Banjar / Desa.
 - c. Krama Banjar / Desa Pakraman taler dados nyuarang kulkul ritatkala ketiben Baya.
- (4) Suaran Kulkul manut kewigunanipun:
 - a. Kulkul Ngempang (tung-tit-tung-tit) pewanenganipun teteg nenten mepewilangan ritatkala:
 1. Ngemedalang utawi mendak Ida Betara.
 2. Surya lan Bulan kepangan.
 3. Ngaturang Piodalan utawi ngiyasin lan selanturnyane.
 - b. Kulkul kelayu sekaran ping tiga sada alon / banban (tung, tung, tung).
 - c. Kulkul tedun mekarya utawi sangkep mesuara duang tulud banban.
 - d. Kulkul Pewiwahan mesuara atulud ping pitu sada banban (tung, tung, tung, tung, tung, tung, tung).
 - e. Kulkul ngembasin oka mesuara apisan (tung).
 - f. Kulkul geni Baya suaranipun atulud bulus tan pepegatan.
 - g. Kulkul anak ngamuk petang tulud bulus, atulud mesuara ping pitu (tung, tung, tung, tung, tung, tung, tung).
 - h. Kulkul arta Baya utawi kemalingan mesuara tigang tulud bulus, atulud mesuara ping tiga (tung, tung, tung).
 - i. Kulkul ngentenin ngampung / ngampig pantun mesuara atulud.

- j. Kukul ngewandeyang karya tabuh ngempang ping tiga sada banban, (tung-ting, tung-ting, tung-ting).
- (5) Sang sane nyuarang kukul nenten manut sekadi wiwit (3), patut kedanda manut perarem.

Palet 4

INDIK PARUMAN MIWAH SANGKEPAN

Pawos 18

- (1) Ngartinin Paruman Miwah Sangkepan.
- Paruman inggih punika :
Petemon Prejuru sareng Krama ritatkala wenten pikobet sane patut kebaosan mangda ngemolihan pemutus.
 - Sangkepan inggih punika :
Petemon Prejuru sareng Krama asasih apisan ritatkala Tumpek, Buda Kliwon, miwah Wraspati Kliwon.
- (2) Paruman miwah Sangkepan luire :
- Paruman :
- Paruman Kerta Desa
 - Bandesa Pekraman patut marumang Kerta Desa, prade wenten wicara utawi bebaosan sane mebuat ring Desa.
 - Sane patut nyarengin parum punika : Bendesa, Pengliman, Penyarikan, Petengen, Petajuh, Saba, Kelihan Adat lan dulu-dulu Desa manut perarem.
 - Pemutus Paruman Kerta Desa, patut kesobiyahang miwah kelaksanayang yening sampun manut, maka pemitegep perarem.
 - Paruman Desa
 - Bendesa Pekraman patut marumang Krama Desa, prade wenten wicara sane nenten presida keputusang ring Desa.
 - Pemutus ring Desa, patut kesobiyahang miwah kelaksanayang yening sampun manut, maka pemitegep perarem.

Sangkepan :

- Sangkepan Desa.
 - Sangkepan ring Desa kewentenang nemonin rahina Buda Kliwon miwah Wraspati Kliwon.
 - Sane patut nyarengin Sangkepan punika : Bendesa, Pengliman, Penyarikan, Petengen, Petajuh, Kelihan Adat

- c. Pemutus Sangkepan Prejuru kesinanggeh peswara, durung dados mitegenin Krama sedereng polih pemutus paruman Krama, sejawaning pituduh Sang Ngawa rat.

Pawos 19

Sangkepan Banjar.

- a. Sangkepan ring Banjar kelaksanayang nyabran sasih nemonin Tumpek.
- b. Sangkepan ring Banjar taler kewentenang manut kewigunan ipun.
- c. Sane dados menggala miwah ngenter rikanjakan parum inggih punika Kelihan Adat. Prade kepialang, dados kewakilin olih Penyarikan Banjar.
- d. Ritatkala sangkep utawi parum ring banjar, patut meduluran cane lan canang sejangkepnyane.
- e. Sangkepan napkala/padgata kala patut meduluran canang sari lan dupa.
- f. Sedurung ngawitin mebaosan canange keatur piuningang olih Prejuru, Krama patut ngelungsur waranugraha ring Ida Sang Hyang Widhi melarapan antuk panganjali. Risampune puput bebaosane taler ngaturang Prama Santi.
- g. Pemutus sangkepan banjar patut kelaksanayang olih Kelihan Adat, sekemawon nenten dados piwal ring Awig-awig Desa Pekraman.
- h. Pradene paruman punika nenten keingkupin olih Krama banjar, wenang Prejuru Banjar ngilikang utawi mligbagan bebaosan punika mangda presida kesungkemin.
- i. Prade nenten kesungkemin ping tiga Prejuru banjar ngangsegang bebaosan utawi ngulati galah malih.
- j. Prade wenten sinalih tunggil krama metilar sedereng puput parum utawi sangkepan, ika tanjek laler kewastanin wenang kedanda sepatute utawi ten padunan.

Pawos 20

- (1) Ritatkala Banjar muwah Desa parum utawi sangkep krama Banjar utawi Desa Pekraman patut mebusana Adat madya.
- (2) Tetikasan Krama Banjar/Desa Pekraman mangda melinggih ngajengan linggih Prejuru nampek ring genah mebaosan.
- (3) Nenten kelugra makta gegawan.
- (4) Nenten kelugra ngewetuang swara gora utawi biota.
- (5) Ngulati uteng pemutus bebaosan mangdane briyuk sepanggul, punika sinanggeh perarem.

- (6) Prade wenten memurug wiwit 1, 2, 3 lan 4 ring ajeng wenang kedanda manut perarem.

Palet 5

INDIK DRUWEN DESA

Pawos 21

Kekuwub druwen Desa Pakraman Guwang munggah kadi ring sor :

- (1) Sehanan Kahyangan jangkep sekeluir pelabannyane :
 - a. Pura Kahyangan Tiga (Desa, Puseh, Dalem).
 - b. Pura Manca Desa (Dangka, Gaduh, Klikuh, Pasek, Penyarikan, Ngukuhin).
 - c. Pura Hyang Api, Pura Bangkiang Sidem, Pura Beji, Pura Melanting, Pura Ratu Tabeng, Catus Pata ring wewidangan Desa Pakraman Guwang.
- (2) Piranti-piranti druwen Desa manut perarem.
- (3) Desa Pakraman Guwang nyantenang ring kekuwub Kahyangan druwen Desa Pakraman Guwang, nganinin indik wewangunan miwah Upacara lan Upakara pengaci ring Kahyangan inucap.
 - a. Wewangunan, Upacara lan Upakara pengaci ring Pura Kahyangan Tiga ketangga olih Krama Desa Pakraman Guwang.
 - b. Wewangunan, Upacara lan Upakara pengaci ring Pura Manca Desa (Dangka, Gaduh, Klikuh, Pasek, Penyarikan, Ngukuhin) ketangga olih Krama Desa Pakraman Guwang manut ring perarem.
 - c. Wewangunan, Upacara lan Upakara pengaci ring Pura Hyang Api, Pura Bangkiang Sidem, Pura Beji, Pura Melanting, Pura Ratu Tabeng, Catus Pata ring wewidangan Desa Pakraman Guwang ketangga olih Krama Desa Pakraman Guwang manut ring perarem.

Palet 6

PIKOLIH MIWAH KEWIGUNAN

Pawos 22

- (1). Pikolih Desa Pakraman:
 - a. Pikolih saking pelaba Pura, sawah miwah tegalan.
 - b. Urunan Krama Desa Pakraman.
 - c. Paica saking Guru Wisesa.
 - d. Paica-paica utawi punia tiosan sane patut melarapan saking ledang / lila.

- e. Usaha Desa Pakraman luire : Pasar Tenten, Pasar Seni, Lembaga Perkreditan Desa, CBD (Community Based Development), lan sepenunggilan ipun keunggahang ring perarem.
- (2). Kewigunan pikolih druwen Desa keanggen prebea ngewangun ring perahyangan, pawongan, miwah pelemahan.
- (3). Druwen Desa nenten dados keadol, kagentosin / keuah olih Prejuru Desa, sejabaning sampun polih kesumanggeman Krama Desa.

Palet 7

SUKERTA PAMITEGEP

Kaping 1

INDIK KARANG, TEGAL LAN CARIK

Pawos 23

- (1) Karang :
- a. Karang Desa.
- Karang Desa inggih punika : karang pedruwen Desa sane magenah ring wewidangan Desa Pakraman Guwang, sane ngemong karang Desa patut ngayahin Kahyangan Tiga.
- b. Karang Gunakaya.
- Karang Gunakaya inggih punika : tanah utawi karang sane madasar antuk numbas, waris, hibah lan sepanunggilannyane medasar antuk ilikita sane pastika.
- (2) Krama Desa " sane ngamong peumahan karang Desa utawi peumahan karang Gunakaya patut ngewatesin karang inucap mangda pekantenannyane asri.
- (3) Prade wates inucap kerasayang ngelikadin, yening pada arsa penyandinge dados wates punika kagentosin ngangge pinget kemanten, utawi precihna ngangge panceng (patok beton), kesaksinin olih Prejuru Desa.
- (4) Wates sisi kaler miwah sisi kangin patut kekaryanin olih sang ngamong peumahan inucap sane mewasta gegaleng keluan.
- (5) Prade wenten karang kebengbeng miwah karang embet, mangda keutsahayang wenten pemargin nyane melarapan antuk paigum.
- (6) Prade wenten sinalih tunggil Krama jagi ngaryanang songkuwung wiadin got sane magenah ring sisin margine mangda linggahnyane senistane tengah meter (50 sentimeter).
- (7) Sehananin peumahan, ring ajeng tembok penyengker sane marep kemargine patut medaging ambal-ambal mangda kekantenin asri.

- (8) Tanah ambal-ambal inggih punika tanah pekarangan sane wenten ring ajeng tembok penyengker sane marep ke margine.
- (9) Tanah ambal-ambal sane keanggen olih krama Desa keni dudukan (*retribusi*) manut perarem.

Pawos 24

- (1) Krama Desa nenten kelugrayang :
 - a. Ngalah-ngalahin margi, tegal, karang Desa lan tanah ambal-ambal, lsp.
 - b. Ngalah-ngalahin linggih Kahyangan, tegak Setra, lan sekancan linggih sinanggeh suci.
 - c. Ngalah-ngalahin margin subak sane sampun keenter olih Subak.
 - d. Ngalah-ngalahin margin Toya sane sampun keenter olih Subak.
- (2) Prade wenten sekadi ring wiwit 1 aksara a lan b, wenang kedanda manut perarem.
- (3) Nenten kedadosang ngembakang toya limbah sane mewiwit saking bada wewalungan, lan sepenunggilannyane saha ngewetuang ambu kaon ke pekarangan pisaga, ke margine, ke telabahe utawi tukad, bilih-bilih ke genah sane sinanggeh suci.
- (4) Nenten kedadosang ngutang luhu, wangke miwah sehanan reged ke pisaga, ke sawah, margi, tukad utawi telabah, bilih-bilih ke genah sane sinanggeh suci sejabaning wenten pecaruan dados ngutang pemali kemanten ring perempatan margi kerinin ngaturang canang sari.
- (5) Sang sane memurug sekadi inucap ring wiwit 3 lan 4, wenang kedanda manut perarem.

Kaping 2

INDIK PEPAYONAN

Pawos 25

- (1) Ngawit nandur pepayonan tanem tuwuh patut adepa agung (duang meter) ngejerowang dohnyane sakeng wates pekarangan.
- (2) Yening wenten pepayonan ngungkulin utawi ngeliwatin tembok wates marep kemargine mangda kewara olih Prejuru Banjar nyane mangda ngebah utawi notor.
- (3) Yening wenten tetanduran ngungkulin, mewastu jaga mayanin kepisaga patut kewara antuk peigum ping ajeng presida sang nuwenang pepayonan punika ngebah utawi notor.
- (4) Prade sampun kewara taler nenten wenten usaha sang nuwenang pepayonan punika sang rumasa kejejehan / kejerihin wenang mesadok ring Prejuru.

- (5) Prejuru risampun nitenin pepayonan inucap patut nitahang ring sang nuwenang ngebah utawi notor, prade sang nuwenang nenten inut ring penepas Prejuru kesadokang ring sang ngawewenang.
- (6) Sang keni pemidanda penyangaskara saha prebea arep ring wewangunan sang kerubuhin luire:
 - a. Sang nuwenang pepayonan punika sinanggeh mayanin, prade pungkut ngerubuhin wewangunan krama tios.
 - b. Sang notor / munggul utawi ngebah pepayonan tur ngerubuhin krama tios.

Kaping 3

INDIK WEWANGUNAN

Pawos 26

- (1) Nyabran ngewangun patut :
 - a. Mesadok ring Prejuru Desa utawi Banjar ping ajeng prade wewangunan nganinin wates.
 - b. Ngangge sukat Asta Bhumi miwah gegulak Asta Kosala Kosali senistane manut ring petitis niskala.
 - c. Nenten ngungkulin kepisaga.
- (2) Nenten kedadosang ngewangun ngungkulin pisaga, bilih-bilih tembok wewangunan punika ring telangin wates, risampun kewara tur kesadokang ring Prejuru, lan sampun kewara antuk Prejuru taler nenten keanutin, wenang sane nuwenang wewangunan punika kedanda nista, madya, utama manut **perarem**, tur wewangunan punika kegetep, tur kekaryanang abangan nanging kecaron toyane nenten dados kepisaga.
- (3) Prade wenten ngewangun mekadin ring tembok wates anak tiosan yaning ngangge abangan, mangda dasar tembok wewangunan punika mesengker atapak malang.
- (4) Yening jaga ngewangun Bale Bali patut mesengker telung tampak malang, sakeng wates tembok anak tiosan.
- (5) Yening ngewangun ring tanah ambal-ambal, patut polih uwak-uwakan Prejuru Banjar/Desa Pakraman.

Kaping 4
INDIK WEWALUNGAN
Pawos 27

- (1) Sehanan Krama Banjar/Desa Pakraman sane memiara sehanan wewalungan mangda seyaga nitenin/negul, utawi ngelogor mangda nenten ngerusak kepisaga, kesawah, utawi tegalan Krama tiosan, bilih-bilih ngeletehin genah-genah sane sinanggeh suci.
- (2) Prade wenten wewalungan melumbar ngeleb ngerusak genah kadi ring ajeng patut ketaban tur sang nuwenang kedanda, ping kalih nawur penebas sane rusak manut penglokika Prejuru Banjar/Desa.
- (3) Yening ngeletehin genah-genah sane sinanggeh suci, patut mrayascita antuk yadnya nista, madya, utama, sanistane antuk Upakara caru eko sato miwah kedanda manut **perarem**.
- (4) Prade wenten wewalungan melumbar ngeleb tur nyengkalen krama tios, patut krama sane nuwenang wewalungan inucap nanggung prebea, lan sepenunggil ipun.
- (5) Yening wewalungan padem, wangken ipun patut ketanem, utawi kegeseng.
- (6) Nenten kedadosang nganggonang miwah ngelumbar wewalungan minakadi :
 - a. Ring pelemahan Pura, miwah genah tiosan sane kesinanggeh suci.
 - b. Ring Setra, margi miwah tanah ambal-ambal.
 - c. Ring tegalan utawi karang druwen krama tiosan.
 - d. Prade wenten sane memurug sekadi inucap ring wiwit 6 aksara a, b, c, wenang kedanda nista, madya, utama manut **perarem**.

Kaping 5
INDIK BAYA
Pawos 28

- (1) Baya wenten kalih :
 - a. Baya sangkaning Alam.
 - b. Baya sangkaning Manusa manut **perarem**.
- (2) Prade wenten Krama Banjar/Desa ketiben Baya polih pesayuban lan dana punia saking Desa Pakraman manut **perarem**.
- (3) Krama Desa wenang mepitulung nganutin Baya sane nibenin.
- (4) Krama Desa sane manggihin sahanan sane kebawos Baya, patut digelis nyuarang Kulkul.
- (5) Prejuru Desa wenang niwakang pematut ring sang sane ngelaksanayang Baya.

Kaping 6
PENYANGGRAN BANJAR
Pawos 29

- (1) Ritatkala ngewangun Panca Yadnya suka duka polih penyanggran Banjar manut agung alit Yadnya.
- (2) Penyanggran Banjar sane kemargiang nganutin pinunas sang meyadnya mangda yadnyane punika presida lumaksana.
- (3) Krama sane nunas penyanggran Banjar, patut atur piuning ring Prejuru Banjar senistane 5 (limang) dina sedereng Upacara Yadnya.
- (4) Prejuru Banjar wenang nureksain sang jaga nunas penyanggran Banjar, saha milah-milah/ ngayunang utawi ngerincikang penglaksanaan nyane.
- (5) Prejuru Banjar raris nyobyahang ring Krama Banjar kewentenan ageng alit yadnyane saha ngenterang pengelaksanaan nyane.
- (6) Upacara Yadnya sane kelaksanayang olih Krama patut ngaturang Prejuru Desa lan Prejuru Banjar nyaksiang.

CATURTYAS SARGAH
SUKERTA TATA AGAMA
Palet 1
INDIK DEWA YADNYA
Pawos 30

- (1) Pelinggih Penyiwian Kahyangan Desa Pakraman Guwang, luire :
 - a. Kahyangan Tiga minakadi :
 1. Pura Desa.
 2. Pura Puseh.
 3. Pura Dalem.
 - b. Pura Manca Desa :
 1. Pura Dangka.
 2. Pura Gaduh.
 3. Pura Klikuh.
 4. Pura Pasek.
 5. Pura Penyarikan.
 6. Pura Ngukuhin.
 - c. Kahyangan Subak, minakadi :
 1. Pura Cengcengan.
 2. Pura Lumbung.

3. Pura Ulun Carik.

d. Pura Melanting.

e. Pura Ratu Tabeng.

f. Pura Dadia, Paibon, Pantian, Pemerajan suang-suang Krama.

(2) Pelinggih penyiwian ring wewidangan Kahyangan Tiga, minakadi :

a. **Pelinggih penyiwian ring Pura Desa luire :**

Ring Jeroan :

1. Pelinggih Ratu Ngrurah Agung.
2. Pelinggih Gedong Ida Betara Desa.
3. Pelinggih Gedong Ida Betara Penataran
4. Pelinggih Penyambian Uluwatu.
5. Pelinggih Paibon.
6. Pelinggih Penyambian Ratu Maspahit.
7. Pelinggih Penyambian UlunDanu.
8. Pelinggih Penyambian Batur.
9. Pelinggih Ratu Maspahit.
10. Pengias Desa.

Ring Jaba Tengah mekadi :

1. Pelinggih Bale Agung.
2. Pengrurah Bale Agung
3. Pengias Bale Agung.

Ring Jaba mekadi :

1. Pelinggih Pan Balang Tamak.
2. Pengias Bale Pegat.
3. Pelinggih Melanting.

b. **Pelinggih penyiwian ring Pura Puseh luire :**

1. Padmasana
2. Meru tumpang pitu Pelinggih Ida Betara Puseh.
3. Penyambian Uluwatu
4. Pelinggih Paibon.
5. Pelinggih Sapta Petala.
6. Pengias Besukih.
7. Pengias Puseh.
8. Pengaruman.
9. Pingkupan Puseh lan Desa.

c. **Pelinggih penyiwian ring Pura Dalem luire :**

1. Pura Prajapati
2. Pelinggih Ratu Ngurah

3. Pelinggih Ratu Gede
4. Pelinggih Batan Jepun
5. Pura Hyang Api.
6. Pura Beji.
7. Pelinggih Penangkilan / Pedarman.

Pawos 31

- (1) Rahina Piodalan suang-suang Kahyangan inucap :
 - a. Pura Puseh, Pura Desa lan Bale Agung : rikala Buda Kliwon Gumbreg.
 - b. Pura Dalem, Pura Prajapati, Pura Hyang Api lan Pura Beji : rikala Saniscara Kliwon Kuningan.
 - c. Pura Manca Desa (Pura Dangka, Pura Gaduh lan Pura Klikuh) : rikala Buda Kliwon Gumbreg.
 - d. Pura Pasek : rikala Purnama Kapat.
 - e. Pura Penyarikan : rikala Buda Umanis Medangsia.
 - f. Pura Ngukuhin : rikala Buda Cemeng Klawu.
 - g. Pedarman-pedarman penangkilan ring Pura Dalem : rikala Saniscara Kliwon Kuningan.
 - h. Pura Melanting : rikala Buda Wage Kelawu.
 - i. Pura Kahyangan Subak : kesukserahang ring Krama Subak.
 - j. Pura Ratu Tabeng : rikala Kajeng Kliwon Uwudan Sasih Kelima.
 - k. Pura Dadia, Paibon, Pantian miwah Pemerajan, kesukserahang ring penyungsung nyane suang-suang.
- (2) Penemayan Odalan/Petirtan ring Pura Kahyangan Tiga : ngenem sasih.
- (3) Pengaci ring Pura Kahyangan Tiga :
 - a. Pura Puseh, Pura Desa lan Bale Agung :
 1. Nista : Spen (Banten Pereman).
 2. Madya : Mingkup (Banten Bangkit).
 3. Utama : Pedudus (Banten Bangkit lan Catur).
 - b. Pura Dalem:
 1. Nista : -
 2. Madya : Mingkup (Banten Bangkit).
 3. Utama : Pedudus (Banten Bangkit lan Catur).
 - c. Ngusaba Desa, Ngusaba Nini, lan Ngusaba Dalem :
 1. Ngusaba Desa lan Ngusaba Nini : ring Pura Desa lan Bale Agung.
 2. Ngusaba Dalem : ring Pura Dalem.

3. Aci Karya Ngusaba ring ajeng kelaksanayang sekirang-kirang nyane 33 (tigang dasa tiga) warsa apisan.
- d. Pemargin pengaci ring Pura Kahyangan Tiga, manut sastra Agama lan dresta, sekadi ring sor :
 1. Sekeluwirin Upacara miwah Upakara Pengaci: kemedalang olih Krama Desa Pekraman Guwang, keetang antuk Bendesa, sampun keunggahang ring ilikita Tunggul banten.
 2. Perindikan ngamong ayah-ayahan rikala odalan, keempon olih Krama Banjar, megegilir manut peilehan perarem Desa, manut dresta sekadi sane sampun kelaksanayang.
 3. Ayahan penyangga, minakadi : mekarya Taring, Panggungan, Sanggar Surya lan tios-tiosan kepah ring Banjar sane ten polih ngamong piodalan, saha megilir manut peilehan perarem Desa, sane sampun taler keunggahang ring ilikita Tunggul Ayahan Penyangga/ Penyanggra.
 4. Rikalaning odalan Ida Betara Kahyangan Tiga menemu Purnama Pralingga Ida Betara sareng sami patut melasti ke Segara, kesanggra olih krama Desa, sekewanten Krama Banjar sane polih ngamong piodalan, nenten polih pahan penyandang. Asapunika taler rikalaning odalan nemoning sasih kelima.
 5. Rikalaning odalan pedudus ring Pura Dalem, Ida Batara Putra tedun mesolah, kesanggra olih Pemaksan Dalem.
 6. Ida Betara Ratu Rangda tedun mesolah nyalonarang, ngelimang warsa apisan kalaning odalan pedudus, ring penemaya sasihe becik, sejawaning sasih kelima lan keenem, kesanggra olih Krama Pemaksan Dalem lan Krama Desa Guwang.
 7. Pemargi utawi parikrama rikala nunas toya hening manut upakara lan upacara kalaning petirtan ring Kahyanga Tiga, manut dresta, nunas tirta hening ring penyimpanan ke Pura Beji ring Cengcengan, ketegepin antuk peed.
 8. Sane polih ngayah mepeed inggih punika krama banjar sane ngamong piodalan ketegepin antuk Gong manut peilehan Sekaa Gong sane ngayah.
- (4) Memenjor rikalaning rahina Galungan :
 - a. Manut kadi linging sastra Agama, Penjor punika patut ketegepin antuk sampian cili, pala bungkah, pala gantung miwah sanggahnyane merupa arda Chandra.
 - b. Pekarangan sane medaging Sanggah/Pemerajan, patut ngadegang Penjor ring lawang nyane. Prade memurug keni danda manut perarem.
 - c. Ritatkala Galungan nemunin Purnama kewastanin Galungan Nadi penjor punika patut medaging paksi taler tiyingnyane mekerik, wastra putih kuning.
 - d. Ring rahina Buda Kliwon Pahang, penjor patut kelebar, tur kegeseng medulurang antuk ngaturang canang sari, abunyane kegenahin ring bungkak nyuh gading tur kependem ring natah peumahan.

TATA SUKERTA KAHYANGAN

Pawos 32

- (1) Nenten kelugra ngaranjing ke Pura, mekadi :
 - b. Sang ketiben cuntaka.
 - c. Makta sehananing sane merupa barang kesengguh ngeletehin.
 - d. Makta sato / wewalungan, sejabaning manut kewigunan nyane.
- (2) Parilaksana sane nenten kedadosan ring Pura :
 - a. Mesumpah utawi nayub cor, sejabaning pituduh Bendesa.
 - b. Sekancan sane ngelempasin parilaksana.
 - c. Mebacin, mebanyuh utawi mewarih, mececepan lsp.
 - d. Mungguh taler tedun ring Pelinggih sejawaning pituduh Prejuru Desa / Pemangku.
- (3) Sane memurug kecaping ring wiwit 1 lan 2, wenang kedanda manut **perarem**.
- (3) Tetikasan sane patut kelaksanayang ring Pura.
 - a. Ritatkala ngayah ke Pura:
 1. Pemangku: manut busananing Pemangku, lanang istri mebusana sarwa petak.
 2. Krama Desa: lanang wadon mebusana adat madya.
 3. Krama Desa:
 - Ngawit mayusa: 7 ngantos 14 warsa, patut ngangge busana adat.
 - Yusane langkungan ring ajeng: mebusana adat madya:
Sane lanang: wastra lembaran, destar, kampuh meumpal.
Sane wadon: wastra lembaran lan sesenteng.
 - b. Sang memurug kecaping ajeng, keni danda, manut **perarem**.

Pawos 33

- (1) Yening wenten jatma kerauhan ring Pura, patut kepintonin olih Prejuru utawi Pemangku, yening nenten yukti jatma inucap, patut ketibakin danda manut **perarem**.
- (2) Yening yukti jatma sane kerauhan punika kelinggihang patut Prejuru, Pemangku lan Krama nampa nyuun baos Ida Betara.
- (3) Prade Kahyangan ketiben durmangala, minakadi Baya :
 - a. Pemangku utawi Krama sane ngetangehang, patut digelis nyadokang ring Prejuru.
 - b. Prejuru margiang Upakara sepatutnyane.
 - c. Kerta Desa ngewentenang parum.

Pawos 34

Yening wenten wong dura Desa utawi Krama Desa mepinunas utawi maturan ritatkala nenten wenten Wali ring Kahyangan Tiga patut mesadok ring Prejuru Desa utawi Pemangku.

INDIK PEMANGKU

Pawos 35

- (1) Pemangku inggih punika : Sang sane sampun mewinten Pemangku lan dados jan banggul ring sinunggil Pura.
- (2) Suang-suang Pura ring Desa Pakraman Guwang patut ngadegang Pemangku tur kesaksinin olih Prejuru Desa.
- (3) Ngadegang Pemangku Kahyangan Tiga lan Manca Desa manut dudonan :
 - a. Turunan utawi waris.
 - b. Nyanjan utawi mesembuh, nunas pewuwus ring Ida Sang Hyang Widhi ring Penataran Pura.
 - c. Lekesan utawi Sekar, sane ngemolihang ten dados tulak.
- (4) Prebea ngadegang Pemangku :
Kemedalang saha kelaksanayang olih sang ngadegang, mekadi Krama Desa utawi Pengempon Pura suang-suang.

Pawos 36

- (1). Parilaksana dados Pemangku :
 - a. Patut setata ngelaksanayang swadarmaning dharma sadu, aseweka dharma, lan setata mekadang sastra.
 - b. Nenten kedadosan meparilaksana lempas ring tata susila lan tata agama manut **perarem**
- (2). Swadarmaning dados Pemangku :
 - a. Ngenterin Upacara ring Kahyangan lan nyangga Pandita ritatkala Odalan.
 - b. Swadarmaning Pemangku sane tiosan keunggahin ring **perarem**.

Pawos 37

Prebea ngaryanin banten nyabran asasih ring Kahyangan Tiga lan Manca Desa ketanggung olih Desa manut **Perarem**.

Pawos 38

- (1) Sesari bakti utawi canang pekideh krama sami ngranjing ke Desa kepah olih Desa, selanturnyane kepica ring pemangku sami ritatkala :
- Wali ring Kahyangan tiga.
 - Tumpek Uye (Tumpek Andang).
 - Sugi.
 - Galungan lan Kuningan.
 - Banyu Pinaruh.
 - Nunas pemujung sasih ke lima.
 - Tawur Kesanga.
 - Atiwa-tiwa utawi pengabenan Desa.
 - Upacara sangkaning pengrawuh Guru Wisesa, Desa Lsp.
- (2) Sesari bakti Krama katur ring pemangku rikala rahinan :
- Purnama lan Tilem.
 - Krama maturan ritatkala wenten rerahinan utawi upakara ring puri suang-suang (Panca Yadnya).
- (3) Sesari bakti krama sami sane ngranjing ke Desa manut wiwit 1 ring ajeng kepah manut **perarem**.
- (4) Pituas Pemangku Kahyangan Tiga lan Manca Desa manut **perarem**

Pawos 39

- (1) Pemangku kegentosin riantukan :
- Seda.
 - Pinunas ngraga, tur sampun ketitenin olih Prejuru Desa.
 - Keraryanang olih krama riantukan nilar sesana lan swadarmaning Pemangku.
- (2) Sejeroning Pemangku keraryanang manut wiwit 1 aksara c ring ajeng, swadarma lan pituwasnyane keambil olih Krama Desa kelaksanayang olih Prejuru, tur keserahang ring Pemangku sane anyar.
- (3) Prade Pemangku malih ngalap rabi patut:
- Pemangku sane sampun medue rabi malih ngalap rabi, patut keraryanang dados Pemangku masengker awarsa, sesampune puput masengker patut mewinten Pemangku sareng rabine sami antuk prebea ngraga.
 - Yening Pemangku Kahyangan Tiga lan Manca Desa balu, malih ngalap rabi, patut ngewawanin malih mewinten Pemangku sareng rabine, prebeanyane saking Krama Desa manut dudonan.

- c. Yening Pemangku wenten ngalap rabi wong larangan, makamiwah gamia gemana, wenang keraryanang dados Pemangku.

Pawos 40

- (1) Undagan Pemangku :
 - a. Pemangku Lingsir.
 - b. Pemangku Penyeledihi : inggih punika Pemangku sane ngentosin Pemangku lingsir riantukan nenten mresidayang ngelaksanayang Swadarmaning Pemangku manut pawos 36 wiwit 2.
 - c. Yening Pemangku sampun meyusa 70 (pitung dasa) warsa patut keadegang penyeledihi, tur Pemangku penyeledihi (marep) mepikolih pituas Pemangku.
 - d. Pemangku sane keseledihi nenten polih pituas sejabaning Pitra Yadnya.
 - e. Putran Pemangku kedadosan ngayah ngerombo kerinin antuk mewinten, sakewanten nenten mepikolih pituas.
- (2) Ten wenang keadegang Pemangku luire:
 - a. Wong Cedangga, luire: peceng, perot, cungh, lsp.
 - b. Wong kegeringin mekadi: sungkan ila, ayan, buduh utawi edan.

Palet 2

INDIK RSI YADNYA

Pawos 41

- (1) Sang pacang Mepodgala utawi Medwijati, sejawaning nunas penugrahan ring sang rumawos minakadi ring Parisada Hindu Dharma Indonesia (PHDI), patut taler mesadok ring Prejuru Desa.
- (2) Prejuru patut sareng nyaksinin upakara miwah upacarannyane.
- (3) Prejuru Desa mangda gelis nyobyahang abhiseka kawikon sang mediksa manut penugrahan nabene, saha ngilikitayang ring Paruman Desa miwah Paruman Banjar.

Palet 3

INDIK PITRA YADNYA

Pawos 42

Swadarma lan tetegenan prade wenten Krama Desa kelayu sekaran:

- (1) Sang keduhkitan patut:
 - a. Nyadokang ring Prejuru, tur nunas tetimbangan ring kewentenan nyane.
 - b. Ngaturang ring banjarnyane, prade kependem utawi keabenang.

- (2) Swadarmaning Prejuru Banjar utawi Prejuru Desa:
- Prejuru maritatas pemargin sang keduhkitan, napike pacang kependem utawi keabenang.
 - Nyuarayang kulkul sejabaning mendem mesesiliban.
- (3) Penyanggran Banjar:
- Suang-suang krama banjar, nedunin patus manut **perarem**.
 - Indik ayahan Banjar miwah Penyanggu manut **perarem**.
 - Krama banjar ngambil pekaryan manut dresta, rawuh pengutangan kesetra, ngantos upacara pependeman utawi pengabenan puput.
 - Pemargin sawa miwah upakarannyane mangda dabdab antar, ten dados mesuara wakparusia.
 - Rikala ngendagin wiadin ngancungin, mangda sinarengan, keenter olih Prejuru.
 - Prade memurug kadi inucap ring ajeng wiwit 3 (aksara d lan e) keni pemitanda manut **perarem**.
- (4) Prade sawane melelet:
- Ten dados ngelelet sawa langkungan ring 12 (roras) rahina.
 - Sesampune sawane mebresih, patut mepeti manut dresta.
 - Kalaning sawane melelet, polih pegebagan manut paetangan Prejuru Banjar.

Pawos 43

Pemargin Pitra Yadnya manut dudonan sakadi ring sor puniki :

- Mendem.
Mendem maka cihna pekingsan ring Ibu Pertiwi.
- Megeseng.

Pawos 44

(1) Mendem sawa patut sekadi ring sor puniki :

- Nganutin pedewasan sane ketibakang olih Bendesa Pakraman Guwang.
- Ten dados nginepang bangbang.
- Ten dados mendem sawa, kalaning :
 - Purnama lan Tilem.
 - Saraswati lan Banyu Pinaruh.
 - Sugi Bali (Sukra Kliwon Sungsang).
 - Nyepi.
 - Galungan (Buda Kliwon Dunggulan).
 - Tumpek Kuningan.

7. Buda Kliwon Gumbreg
- d. Dados mendem sawa sakemawon mekingsan :
 1. Prewani.
 2. Buda Kliwon.
 3. Tumpek.
 4. Semut Sedulur, lan Kala Gotongan.
 - a Semut Sedulur tegesnyane, petemoning Saptawara kelawan Panca Wara meurip 13, turmaning meruntutan ping tiga, ngawitin saking : Sukra Pon, Saniscara Wage, Redite Kliwon.
 - b Kala gotongan tegesnyane, petemoning Sapta Wara kelawan Panca Wara meurip 14, tur meruntutan ping tiga, ngawitin saking : Sukra Kliwon, Saniscara Umanis, Redite Paing.
- e. Mekingsan mesesiliban ritatkala nemoning (rangkaian) Wali / Odalan ring Kahyangan Tiga ngawit saking nanceb rawuh penyimpanan, pemargine daslemah (galang tanah), engseb surya (sandikala), ten dados mebersih, ten nyuarang kulkul.
- f. Rare sane durung kepus udel lan meketus untu, yening lampus kependem premangkin tan ngewilangin pedewasan, sedurung kapendem mangda mesadok ring Prejuru.

(2) Mendem sawa nganutin genah setra :

- a. Genah mendem sawa sane durung kepus udel lan durung meketus untu, inggih punika ring setra rare.
- b. Sane sampun meketus untu, ring ulon manut dresta.

INDIK NGIDIH SAWA

Pawos 45

- (1) Yening wenten krama ngidih sawa utawi ngundulang sawa saking dura Desa lan pacang kependem ring setra Desa Pakraman Guwang kedadosan yening sawa punika wenten paiketan kulawarga, sakewanten keni penanjung batu manut perarem.
- (2) Rikalaning penemaya pengabenan, sawa punika patut keabenang olih sane ngidih utawi ngundulang, prade mamurug keni danda manut perarem. Raris sawa ika keabenang olih Krama Desa, antuk Upakara Brahma Prayascita (Swasta Geni).
- (3) Yening wenten krama ngidih sawa kedura Desa jagi keabenang, keni penanjung batu manut perarem.
- (4) Yening wenten krama ngidih sawa ketios Banjar jagi keabenang, nenten keni penanjung batu.
- (5) Yening ten ngarepin ngaben, ten dados ngidih sawa pacang keabenang.

- (6) Ten dados ngidih sawa wong tiosan Agama pacang keabenang.

INDIK ATIWA – TIWA UTAWI PENGABENAN

Pawos 46

- (1) Atiwa-tiwa utawi pengabenan kelaksayang antuk :
- Nyawa Resi utawi Keresian utawi Nywasta, kelaksayang antuk pengawak ilalang, duaning nenten ngagah pendeman, Upakarannyane kebaos Swasta Geni.
 - Sawa Preteka utawi Sawa wedana, kelaksayang antuk mreteka sawa sane durung polih mependem.
 - Asti Wedana, kelaksayang antuk ngagah galih utawi ngagah sawa sane sampun kependem.
- (2) Penemaya pengabenan :
- Ngaben nganutin masa: kedadosang sebilang 3 (tigang) warsa apisan.
 - Ngaben dadakan: kedadosang ngawit mabersih ngantos 12 (roras) rahina.
 - Sane kelugra ngaben dadakan :
 - Sang Sulinggih.
 - Pemangku.
 - Pemangku Manca Desa, prade nenten presida ngaben dadakan dados kependem.
 - Pemangku Pantian, Dadia sane sampun keilikitayang olih Bendesa, prade nenten presida ngaben dadakan dados kependem.
 - Krama Desa kedadosang ngaben dadakan nanging pengabenan nyane kelaksayang ring tiosan Desa utawi dura Desa Pakraman Guwang, dados nunas tirta Kahyangan Tiga.
 - Krama Desa sane lampus rikalaning nyanggra Karya Agung Panca Wali Krama lan Eka Dasa Rudra ring Besakih, lan pedewasannyane ketiwakang olih Sang Ngawawenang.
 - Tigang sasih sedurung pedewasan pengabenan sane ketiwakang olih Bendesa, krama Desa sane lampus kedadosan mekingsan ring toyo, tur ring penamaya pengabenan mangda keabenan.
- (3) Dudonan pengabenan sekadi ring sor :
- Ngendagin.
 - Ngaskara utawi Upadesa.
 - Ngagah sawa lan Pengutangan antuk ngeseng sawa.
 - Pengiriman utawi nganyut.

Pawos 47

Pemargi utawi ambah sang lampus :

- (1) Prade lampus/seda sangkaning salah pati wiadin ngulah pati, dados kebakta budal saha kepreteka lan keupekara sepatutnyane, raris kependem ring setra utawi keabenang.
- (2) Sapunika taler sang lampus sangkaning sungkan ngelalahin lsp, pateh sekadi ring ajeng.
- (3) Sang sane ngerobang sungkan ngelalahin, prade sang sungkan punika lampus, patut nyadokang ring Prejuru saha nguningayang wiwitan sungkan nyane, yening memurug keni pemicanda manut **perarem**.
- (4) Prade lampus sangkaning salah pati wiadin ngulah pati, sampun kependem ring setra. Yening wenten wicara nyantos wenten sewala patra saking sang ngawewenang mewastu ngokoh sawa ring setra jagi keotopsi. Riwusan otopsi, sawa ika nenten kedadosang kependem malih, sawa ika wenang kegeseng utawi mekingsan ring toyo.
 - a. Prade wenten uwakan pedewasan ngaben saking Desa patut keabenang.
 - b. Prade nenten wenten uwakan sakeng Desa patut keabenang ring dura Desa.
 - c. Pemargin sekadi inucap ring ajeng (aksara a miwah b) prebea ketanggung olih kulawargannyane. Prade nenten mresidayang, prebea ketanggung olih Desa manut **perarem**.
 - d. Proses sewusan pengangkatan (ngangkid) jagi ketunasang ring Sang Pandita / Sang Medwijati.
- (5) Prade wenten wong wadon lampus kanton ngadut manik, nenten dados kependem, jantos bobotan nyane keembasang dumun.
- (6) Prade wenten wong lampus ring pekarangan tiosan, tegalan, sawah, lsp, patut sang medrebe sawa ika mreayascita genah inucap, senistane Caru Eka Sato.

PEMANGKU KELAYU SEKARAN

Pawos 48

- (1). Prade Pemangku lampus / kelayu sekaran patut ngemargiang Pitra Yadnya.
- (2). Indik pemargin Pitra Yadnya inggih punika :
 - a. Pemangku Kahyangan Tiga: Desa, Puseh, Dalem (Dalem Puri, Dalem Kemimitan) lan Prajapati prebea nyane ketangga lan kesangra olih Desa, ageng alit Upakara manut **perarem**.
 - b. Indik pemargin Pitra Yadnya Mangku Manca Desa (Dangka, Gaduh, Klikuh, Pasek, Penyarikan, Ngukuhin), Mangku Ratu Gede (Gedong Delod), Mangku Beji, Mangku Hyang Api, miwah Mangku Ratu Tabeng, ritatkala ngelaksanayang

upacara Pitra Yadnya kesanggra olih kulawargannyane, polih punia saking Desa manut **perarem**.

- c. Indik pemargin Pitra Yadnya Mangku Dadia, Paibon, lan Pantian mewed saking Desa Pakraman Guwang, sane sampun keilikitayang ring peiketan pemangku, ritatkala ngelaksanayang upacara Pitra Yadnya kesanggra olih kulawargannyane polih punia saking Desa manut **perarem**.

Palet 4

INDIK MANUSA YADNYA

Pawos 49

- (1) Manusa Yadnya inggih punika: Upacara miwah Upakara darmaning manusa, ngawit saking petemoning kama petak kelawan kama bang sejeroning garbhan ibiyang ngantos lampus riwekas.
- (2) Upacara ring ajeng medudonan sekadi ring sor :
 - a. Megedong-gedongan : duk pengrempinian (yusan bobotan wawu enem sasih ngantos sedurung embas).
 - b. Duk sang kamareka wawu embas.
 - c. Kepus udel utawi kepus puser.
 - d. Ngelepas aon : risampune meyusa 12 rahina.
 - e. Akambuhan : rarene wawu mayusa 42 rahina.
 - f. Nyambutin utawi nigang sasihin.
 - g. Peweton sesampune rarene meyusa enem sasih (210 rahina).
 - h. Ngempugin : rikala anak alit wawu tumbuh untu.
 - i. Munggah daha / teruna : wadon ngeraja sewala, lanang ngeraja singa.
 - j. Metatah utawi mepandes.
 - k. Mewiwaha / medengen-dengen.
 - l. Mewinten : nunas penugrahan ring Sang Hyang Aji Saraswati.
- (3) Upacara miwah Upakara ring ajeng, nista, madya, utama, nganutin sastra Agama miwah Catur Dresta.

Palet 5

INDIK BHUTA YADNYA

Pawos 50

Bhuta Yadnya inggih punika: Upacara miwah Upakara pebeakala ring pertiwi lan Kahyangan, ring sarwa prani, miwah Upakara ring Bebutan, lsp.

- a. Ring Tumpek Landep: Upakara pebeakala ring sarwa senjata sane landep/lanying, luire: keris, tumbak, paet, mutik, lsp.
- b. Tumpek Wariga utawi Tumpek Uduh, taler kebaos Tumpek Pengatag, Upakara pebeakala ring sarwa tumuwuh.
- c. Tumpek Kuningan: Upakara pebeakala ring sarwa Siandana utawi pelinggihan.
- d. Tumpek Krulut: Upakara pebeakala ring sarwa lelanguan, minakadi: gong, angklung, gender, lsp.
- e. Tumpek Uye, taler kebaos Tumpek Kandang: Upakara pebeakala ring sarwa wewalungan utawi ingon-ingon.
- f. Tumpek Wayang taler kebaos Tumpek Ringgit: Upakara pebeakala ring sarwa reringgitan, luire: wayang, tapakan / tapel, togog, gambaran, lsp.
- g. Upakara pebeakala ring manusa :
 1. Upakara pebeakala munggah daha / teruna.
 2. Upakara mekalan-kalan rikalaning pewiwahan.
 3. Upakara pebeakala ring Penampahan Galungan.
- h. Upakara Yadnya Sesa: mesaiban nyabran rahina wusan meratengan.
- i. Mekelud: Upakara nyanggra Rerahinan / Odalan antuk sesayut durmangala.
- j. Upakara pebeakala ring Pretiwi miwah Kahyangan katur ring sarwa Bhuta Kala kewastanin Mecaru.

UPAKARA CARU LAN TAWUR

Pawos 51

(1) Caru sasih kalima :

Mecaru ring Pura Hyang Api, antuk Panca Sata mepenyambleh kucit butuhan, ring Kajeng Kliwon Enyitan kelaksanayang olih Banjar megilir, prebea saking Krama Desa, keetang saha keenter olih Prejuru, giliran lan prebea sampun munggah ring Tunggul.

- a. Ring Catus Pata, mecaru ayam brumbun, kesanggra olih Krama Banjar. ring Sanggah Penyawangan Medwaja Ghana Catur Bhuja, polih pahan saking Desa.
- b. Ring samping lawang / samping angkul-angkul krama suang-suang, nanceb sanggah caru kalih panta Medwija Ghana, sebilang Kliwon ngaturang banten saka sidan manut **perarem**
- c. Ring pengawit caru puniki, kewentenang tabuh rah, sebilang pempatan manut dresta, pemuput ring Pura Hyang Api.
- d. Ida Betara Ratu Gede lan Ida Betara Putra melasti kesegara, kesanggra olih Krama Desa lan keenter olih Prejuru

- e. Sebilang rahina Kliwon, Ida Betara Putra tedun melancaran kesanggra olih Krama Banjar megilir, polih ilehan pada apisan, sejabaning Banjar Danginjalan. Galah ngemijilang rikalaning tengah wengi.
- f. Banjar Tatag polih peilehan ngemedalan Ida Betara Putra apisan.
- g. Sesampune puput ilehan ngemijilang sebilang Kliwon ngelantur ngemijilang sebilang Kajeng Kliwon, taler megilir pada apisan, sejabaning Banjar Danginjalan.
- h. Krama Desa nunas sikepan ring Pura Dalem.
- i. Mecaru ring Pura Ratu Tabeng ring Banjar Danginjalan, ring Kajeng Kliwon Uwudan.

(2) Upakara Tawur Kesanga kadi ring sor :

- a. Majeng ring Ida Betara patut :
 - 1. Pengelong ping roras, ngemijilang Ida Betara saha nyejerang ring Pura suang-suang.
 - 2. Pengelong ping telulas, Ida Betara lunga Melasti ke Segara.
 - 3. Pemargine keenter olih Prejuru Desa Pakraman
 - 4. Rikalaning mewali budal saking segara, nyejer ring Bale Agung selami kalih rahina katuran yadnya manut dresta keenter olih Prejuru Desa, ring wusan Tawur Kesanga kelanturan Murwa Daksina, wawu keaturan budal ke suang-suang Pura (Peyogannyane).
 - 5. Periindikan penglaksana pemargi rahina pemelastian ring ajeng punika manut Desa Kala Patra miwah Dresta, kengin keadungan ring rerahinan ageng miwah Wali / Odalan ring Kahyangan Tiga, manut pemutus Kerta Desa Pakraman kesarengin olih Para Dulu miwah Pemangku.
- b. Ring Tileming Cetra masa, mecaru Tawur Kesanga manut dresta :
 - 1. Ring suang-suang Banjar, kewentenang pecaruan lan pepranian. Indik banten pepranian manut perarem.
 - 2. Kewentenang tabuh rah, keenter olih Prejuru Desa.
 - 3. Ring Desa Pakraman, megenah ring Jaba Pura Desa / Bale Agung, kelaksanayang Upakara Tawur Kesanga, manut perarem.
Kesanggra olih Banjar megilir, prebea saking Desa, keenter olih Prejuru Desa, tur kewentenang tabuh rah.
 - 4. Ring suang-suang Krama, mesegeh manut arah-arah saking Desa
 - 5. Rikalaning sorene raris mebuu-buu, ngelantur ngrupuk ring wewidangan Banjarnyane suang-suang manut dresta.
 - 6. Tata cara pengrupukan mangda memargi terepti, ketureksin olih Kerta Desa Pakraman, Kesanggra Pecalang Desa.

INDIK PENYEPIAN

Pawos 52

- (1) Bebaratan Penyeopian manut catur brata Penyeopian kadi ring sor:
 - a. Amati geni: ten dados meapi- api, sejawaning:
 1. Rikala wenten odalan ring Kahyangan, Dadia, Pantian, Paibon miwah Puri suang-suang Krama.
 2. Metepetin rare ring genah inucap.
 3. Sang metepetin sungkan ring genah sang sungkan.
 4. Sang meduwe kelayu sekaran ring genah layone.
 - b. Amati karya: ten wenang nyambut karya.
 - c. Amati lelungan: ten dados melelungan, sejawaning Petilik utawi Pecalang Desa, miwah sang sane polih uwak-uwakan antuk ilikita pastika
 - d. Amati lelanguan: ten dados meoneng-onengan, meplalian lsp., ten dados mesuara gora, nabuh gamelan lsp.
- (2) Prade memurug kedanda manut pemutus paruman Kerta Desa nyabran nyanggra penyeopian sane kelaksanayang olih Petilik lan Pecalang Desa manut **perarem**.
- (3) Benjangnyane kewastanin rahina Ngembak Geni, mepiteges nglebaran brata penyeopian.
- (4) Ngelaksanayang Dharma Shanti.

SIWA RATRI

Pawos 53

- (1) Manut kadi linging sastra, rikalaning Catur Dasaning Kresna Paksa ring Magha Masa, (penglong ping patbelas sasih kepitu), kebaos Siwa Ratri.
- (2) Siwa Ratri manut kadi linging lontar Siwa Ratri Kalpa, kadi ring sor:
 - a. Mona brata.
 - b. Upawasa.
 - c. Jagra.
- (3) Rikala pacang ngelaksanayang Siwa Ratri, pinih riyin patut ngaturang pejati sesidan-sidan, saha muspa ring Sanggah utawi Pemerajan suang-suang.
- (4) Ring benjangnyane semeng, ring rahina Tilem Kepitu ngraris ngelebarang bebratan ring segara utawi ring beji, ngaturang muspa ring pemrajan suang-suang, maka cihna sampun ngelaksanayang brata Siwa Ratri

**PANCATYAS SARGAH
SUKERTA TATA PAWONGAN**

Palet 1

INDIK PEWIWAHAN

Pawos 54

- (1) Pewiwahan inggih punika petemon purusa lan pradana melarapan penunggalan kayun sukacita tresna asih kedulurin antuk upasaksi sekala niskala.
- (2) Pemargin pewiwahan wenten 2 soroh luire:
 - a. Pepadikan : kemanggala antuk pekrunan.
 - b. Ngerorod : ngrangkat riyin, wawu kekrunayang.
- (3) Pidadab sang mewiwaha patut:
 - a. Sampun munggah daha teruna (prasida nganutin Uger-Uger sang ngawe wenang).
 - b. Ngemanggehan pada lila (nenten kepaksa).
 - c. Manut kecaping Agama (nenten gamia gemana).
 - d. Prade ngambil tios agama, kemanggala antuk upacara sudi wedhani.
- (4) Pemargin pewiwahan inucap ring ajeng mangda taler nganutin Uger-Uger Sang ngawewenang indik Pewiwahan sane kemanggehang.
- (5) Sang sane murug kecaping ring ajeng manut tripramana, patut:
 - a. Ten manut wiwit 3 ring ajeng, menawi kepaksa (kepelegandang) antenane kengin kepalasang tur kedanda manut **perarem**.
 - b. Sang sane nyarengan melegandang taler kedanda manut **perarem**.
 - c. Sang ngromromin (ngicen genah) pengantenan punika nenten mesadok ring Prejuru Banjar/Desa Pekraman lan Dinas, jantos 3 (tigang) rahina suwenipun pengromrom inucap kedanda manut **perarem**.

Pawos 55

- (1) Pewiwahan sane kepatutang (sah) ring Desa Guwang yening sampun:
 - a. Mewidhi widana, sanistane pebeyakalan (medengen-dengen).
 - b. Kesaksinin olih Prejuru Banjar/Desa Pekraman, saha lantur ngilikitayang ring Prejuru Banjar/Desa Pekraman miwah ring sang ngawewenang.
- (2) Pewiwahan sane lintangin ring asiki (memadu), patut polih kesumangeman ring istri sami sedurungne.
- (3) Prade Pewiwahan punika nenten manut ring wiwit 1 lan 2 ring ajeng, Pewiwahan punika kebaos nenten sah.

Pawos 56

- (1) Pepadikan kelaksanayang ping tiga, inggih punika : ngeluku, ngenduh, mekruna, pemargine munggah ring **Perarem**.
- (2) Ngerorod / Merangkat patut: ngewentenang pemilaku antuk duta purusa utawi pradana, sekirangne 2 (kalih) diri kesarengin olih Prejuru Adat lan Dinas, tur ketegepin antuk ilikita.
- (3) Nyentana yening langkungan ring adiri patut keiguman olih kulawargannyane.
- (4) Prade wenten Krama Banjar / Desa Pakraman Guwang mewiwaha keambil ketios Desa utawi ke dura Desa, patut naur penebas suaran Kulkul ring Banjar wed nyane manut **perarem**.

Palet 2**INDIK EMBAS / KELAHIRAN****Pawos 57**

- (1) Mesadok ring Prejuru.
- (2) Ketegepin antuk ilikita sedurung meyusa 2 (duang) sasih.
- (3) Ngemargiang Manusa Yadnya.

Palet 3**INDIK KEWERUHAN (PENDIDIKAN)****Pawos 58**

- (1) Swadarmaning dados Guru Rupaka patut ngicenin Pendidikan Dasar ring okan ipun.
- (2) Desa Pakraman patut nitetin Pendidikan saking Sekolah Dasar nyantos Sekolah Menengah Atas / Kejuruan ring Krama Desa manut **perarem**.

Palet 4**INDIK KEKERASAN RING KULAWARGA****Pawos 59**

- (1) Pekilitan sareng kulawarga patut nyaga keharmonisan kulawarga.
- (2) Suang-suang Krama patut nyaga keharmonisan kulawarga.
- (3) Suang-suang angga kulawarga nenten dados ngelaksanayang kekerasan.

Palet 5

**NGULATI KESUKERTAN PAKRAMAN
(INDIK HUBUNGAN SOSIAL RING KRAMA SAMI)**

Pawos 60

- (1) Patut saling menghormati antara tetangga.
- (2) Patut saling tolong menolong.
- (3) Patut saling menghormati sesama Krama Desa Guwang.
- (4) Ngewentenin hubungan yang harmonis ring warga Desa Guwang sareng warga tiosan Desa Guwang.
- (5) Krama warga patut hormat ring Prejuru Desa.
- (6) Krama Desa patut menghormati sesama umat beragama.

Palet 6

PALAS MERABIAN

Pawos 61

- (1) Palas merabian wenten kalih luire:
 - a. Palas merabian seantukan sinalih tunggil lampus (seda) meteges balu.
 - b. Palas merabian mewiwit wicara peracihna ten tumus suka citaning idep sang alaki rabi, mepiteges nyapian.
- (2) Palas merabian sangkaning lampus patut wenten ilikita saking sang rumawos.
- (3) Palas merabian (nyapihan) :
 - a. Risampun meduwe Akta Perkawinan, patut atur supeksa peilikitan ring sang rumawos, wastu tinas apadang pemutus, kebawos nyapihan. Mangda ketegepin akta perceraian saking sang rumawos sane kedasarin antuk Putusan Pengadilan.
 - b. Prade nenten meduwe Akta Perkawinan , patut ngaryanang Surat Pernyataan olih sang palas merabian , tur kesaksinin olih Prejuru Adat lan Dinas.
- (4). Pinaka cihna sampun palas merabian manut wiwit 2 lan 3, Prejuru nyobyahang ring Banjar, saha keni penebas suaran Kukul banjar wed nyane manut **perarem**.
- (5). Yening lanang istri patch Banjar, suang-suang keni danda penebas suaran Kukul, manut ring pawos 61 wiwit 4.

Pawos 62

Prade riwekas sang palas merabian presida (kecihnayang) adung malih patut ngelaksanayang pewiwahan malih tur ngaturang pejati penebas suaran kukul ring banjar.

Pawos 63

- (1) Sane kebawos balu, inggih punika :
 - a. Sejeroning pewiwahan sinalih tunggil lampus, utawi palas merabian.
 - b. Balu kabinayang dados kalih :
 1. Balu luh wiwit sentana, utawi sentana rajeg miwah balu luh boya sentana.
 2. Balu muani kepurusa miwah balu muani nyeburin boya sentana.
- (2) Swadarma lan swadikara balu inucap patut :
 - a. Ngemangehang patibrata.
 - b. Nguwasayang waris pegunakaya, kengin ngadol, ngadeang utawi mekidihang yaning sampun polih peiguman saking pianak, utawi pekulawargannyane prade pianak kantun alit-alit.
 - c. Kengin ngidih sentana medasar antuk peigum kulawarga purusa.
 - d. Kewenangan mewiwaha malih prade sampun polih peigum saking pianak dahan/teruna utawi kulawarga purusa.

Pawos 64

- (1) Balu inucap nenten pageh luire:
 - a. Dratikrama utawi paradara,
 - b. Metilar nenten pesadok jantos 6 (enem) sasih tur lempas ring swadarmaning balu.
- (2) Yening mecihna kadi ring ajeng manut tripramana, balu luh boya sentana miwah balu muani nyeburin, nenten polih pahan waris.
- (3) Prade balu inucap pageh, nenten dados ketundung.

Palet 7

INDIK SENTANA

Pawos 65

- (1) Sentana wenten 3 (tigang) soroh, luire :
 - a. Prati Sentana, inggih punika sentana sane metu sangkaning pewiwahan.
 - b. Sentana peperasan, inggih punika sentana antuk ngidih, prade pewiwahan nentan ngewetuang sentana.
 - c. Sentana Pemerasan (pengangkatan anak), inggih punika : kulawarga sane sampun medue sentana, dados malih meras sentana.
- (2) Tata cara indik meras sentana :
 - a. Ngemolihan peiguman saking kulawarga.

- b. Ngangkat sentana manut dudonan patut mekecihna upacara pemerasan sekala niskala.
 - c. Yening sinalih tunggil Krama ngidih sentana patut mesadok ring Kelihan Banjar, miwah ring sang ngawewenang, sekirang-kirang nyane 3 (tigang) sasih sedereng pemerasan.
 - d. Kelihan Banjar inucap mangda nyobyahang ring Banjar, saha katur ring Bendesa Pakraman mangda kesobyahang ring wewidangan Desane.
 - e. Keilikitayang olih sang rumawos.
- (3) Prade wenten oka sane embas nenten mejalaran antuk pewiwahan, patut keperas mangda nenten kebaos asira utawi binjat.

Pawos 66

- (1) Sang patut keperas anggen sentana sekadi ring sor :
 - a. Jatma (wong) megama Hindu.
 - b. Pepernahang nedunang sakeng sang meras.
 - c. Kulawarga sakeng purusa sane durung mewiwaha.
 - d. Prade kulawarga sakeng purusa sane durung mewiwaha taler nenten wenten, dados ngangkat sentana sane sampun mewiwaha sakeng purusa sane durung tedun mebanjar.
 - e. Prade ten wenten, dados sakeng wadon sane durung mewiwaha.
 - f. Prade ten wenten manut aksara e, dados sakeng petunggilan Banjar utawi Desa, prade ten wenten dados sekama-kama.
 - g. Prade ngangkat sentana mewit saking tios agama patut Sudi wedhani.
- (2) Dados ngangkat sentana langkungan ring adiri : lanang, wadon, utawi lanang wadon, sekewanten ten dados kepewiwahayang.

Pawos 67

- (1) Pemerasan patut ketitenin olih Prejuru, prade sulur pemerasan ten manut ring dresta, Prejuru patut ngandeg saha ngicenin tuntunan.
- (2) Sang rumasa ten lila indik pemerasan punika mangda mesadok ring Prejuru senistane asasih sedereng pemerasan.
- (3) Pengelaksana kepungkur, manut pemutus inucap.

Palet 8
INDIK WARISAN
Pawos 68

- (1) Warisan inggih punika : tetamian arta brana lan tetegenan ngulati sukerta sekala niskala keluhurannyane marep ring turunannyane.
- (2) Sane sinanggeh warisan luire:
 - a. Druwe Tengah, makadi : Tanah Bukti, Pura Dadia, Siwakrana, Pemrajan, lsp.
 - b. Arta brana miwah tetegenan (ayah-ayahan).

Pawos 69

- (1) Pewaris inggih punika: sane meduwe warisan turmaning sampun lampus.
- (2) Ahli waris inggih punika : sane nerima warisan, luire :
 - a. Prati Sentana purusa.
 - b. Sentana rajeg.
 - c. Sentana peperasan lanang / wadon.
- (3) Prade ten wenten sekadi ring ajeng, sane sinanggeh ahli waris :
 - a. Turunan purusa pernah ngunggahang mekadi rerama.
 - b. Turunan purusa pernah kesamping mekadi misan, mindon, miwah keponakan.

Pawos 70

Swadarmaning ahli waris :

- a. Nerima saha nguwasayang pahan tetamian saking keluhurannyane minakadi : miara Sangah, Pura, saha pengupakara miwah nyeledihin ayah-ayahan lan tetegenan.
- b. Ngelaksanayang upacara Pitra Yadnya pewaris ngantos puput.
- c. Nawuring utang pewaris.

Pawos 71

- (1) Pengepahan warisan sida kemargiang risampun ngelaksanayang pitra yadnya lan utang-utang pewaris sami buntas (puput) ketaur.
- (2) Ahli waris polih pahan manut ring swadikara.
- (3) Ahli waris manut pawos 69 wiwit (2) nenten polih pahan prade :
 - a. Nilar Agama Hindu.

- b. Santana rajeg sane kesah mewiwaha kebawos nilar kedaton.
- (4) Prade boya ahli waris, dados muponan kewanten, manut dudonan :
 - a. Balu luh wiadin balu muani nyeburin (boya sentana).
 - b. Mulih dahi wiadin teruna, riantukan ring pewiwahan pecak kebawos ninggal kedaton.

TATA TITI PEWARISAN

Pawos 72

- (1) Prade sejeroning pekulawargan ahli waris langkungan ring adiri :
 - a. Kewentenang paigum.
 - b. Yen ten sida dados nunas tetimbangan ring Kerta Desa.
 - c. Prade ten cumpu ring penepas Kerta Desa, dados nunasang ring sang rumawos.
- (2) Prade wenten karang kepud (putung), Prejuru patut nitenin :
 - a. Ahli waris saking purusa manut Pawos 69 wiwit 2.
 - b. Yening ten wenten kecaping Pawos 69 wiwit 2, dados ketibakang ring wadon.
 - c. Yening ten wenten wadon, kebaosang ring Banjar ngelantur ring Desa.

SADTYAS SARGAH

WICARA LAN PEMIDANDA

Palet 1

INDIK WICARA

Pawos 73

- (1) Sane wenang mutusang wicara inggih punika :
 - a. Kelihan Banjar prade sang mewicara metunggilan Banjar.
 - b. Bendesa prade sang mewicara mebinayan Banjar miwah mebinayan Desa.
- (2) Prade sang mewicara sinalih tunggil ten cumpu ring pemutus Kelihan Banjar, mangda nunasang bebandingan ring Bendesa.
- (3) Prade sang mewicara sinalih tunggil ten cumpu ring pemutus Bendesa, mangda wicara punika katur ring sang rumawos.

Pawos 74

- (1) Prejuru Desa wenang maosang wicara sane nungkasin daging awig-awig mewiwit kecorahan lan sekeluire, sinanggeh nungkasin daging Awig-Awig lan Perarem.
- (2) Sejabaning wicara kadi inucap ring wiwit 1, Prejuru wantah nyantos pesadok.
- (3) Penepas mangda pastika nyantenang iwang patut melarapan Tri pramana :
(saksi, ilikita, lan bukti) miwah manut ring catur dresta.

- Dipindai dengan CamScanner

- (4) Pemutus baos mangda kdasar in antuk gilik seguluk.
- (5) Sehananing Awig-awig Desa Pakraman sane pecak sampun wenten sedereng Awig-awig Desa Pakraman puniki kemanggehang, patut keanutang ring sedaging Awig-awig punika.
- (6) Sehananing sane kepastikayang merupa indik pemargi miwah pemitegep Awig-awig puniki, keunggahang ring perarem sane kekardi melarapan antuk Paruman Desa.

Pawos 78

Sekeluwiring sane durung kebawos sejeroning Awig-awig puniki patut kelaksanayang manut tata cara lan dresta sane sampun memargi selanturnyane kesurat dados perarem.

ASTATYAS SARGAH


SAMAPTA


Pawos 79

- (1). Awig-awig Desa Pakraman Guwang kesurat duk Warsa 1992 tur keuwah-uwuhin Warsa 2017.
- (2). Awig-awig puniki ngawit kemargiang risampun kesungkemin ring paruman Krama Desa.
- (3). Awig-awig puniki kesungkemin olih Krama Desa Pakraman duk :

Rahina	:	Redite.
Panca Wara	:	Pon.
Wuku	:	Julungwangi.
Sasih	:	Kesanga.
Icaka warsa	:	1938.
Tanggal Masehi	:	19 Maret 2017.
Megenah	:	Ring Bale Wantilan Pura Dalem, Desa Pakraman Guwang.
- (4) Awig-awig puniki kelingga tanganin olih Prejuru Desa Pakraman, Saba Desa, Prejuru Dinas pinaka saksi.
- (5) Luwir Sang ngelingga tanganin :

Prejuru Desa Pakraman Guwang



Kelihan Saba

I Made Karsa


Prajuru Dinas Pinaka Saksi

Perbekel Desa Guwang



 Cokorda Rai, S.H.

Camat Sukawati



A.A. Gde Putrawan, S.Sos., M.Si
 NIP. 19691024 199003 1 009

Telah Dicatatkan di Dinas Kebudayaan Kabupaten Gianyar,

Pada tanggal : 7 – 11 – 2017

Nomor : 11

Kepala Dinas

Drs. I Gusti Ngurah Wijana, MM. M.Pd.

Pembina Utama Muda

NIP : 19581231 198603 1 298